

Inzko čestitao Almi Zadić na imenovanju za austrijsku ministricu pravde



Visoki predstavnik Valentin Inzko danas je uputio čestitke Almi Zadić povodom njenog imenovanja na poziciju ministrice pravde u Vladi Republike Austrije, te je izrazio želju za nastavkom i intenziviranjem odnosa između Bosne i Hercegovine i Austrije na polju pravosuđa.

„Nakon baronese Arminke Helić u britanskom Domu lordova i bivše švedske ministrice obrazovanja Aide Hadžialić, ovo je još jedna talentirana i uspješna mlada osoba porijeklom iz Bosne i Hercegovine koja je svojim predanim radom i enormnom energijom uspjela ostvariti izuzetnu karijeru u inostranstvu.

Kao izbjeglica, Alma Zadić je završila osnovnu školu, gimnaziju i studij prava sa magisterijem i doktoratom u Beču. Svoje studije je usavršavala na Katoličkom univerzitetu Svetog Srca u Piacenzi i na čuvenom Univerzitetu Columbia u New Yorku. Radila je u brojnim međunarodnim institucijama, uključujući i Međunarodni krivični sud za bivšu Jugoslaviju te kao advokat u renomiranoj međunarodnoj advokatskoj kancelariji.

Od 2013. godine, Zadić je članica Global Shapers Community, međunarodne organizacije mladih ljudi koji preuzimaju odgovornost za sudbinu planete.

Ovim putem njoj osobno upućujem najiskrenije čestitke i želje

za uspješan mandat. Istovremeno, ovo je i poruka političkim elitama u Bosni i Hercegovini da se energičnije angažiraju na sređivanju stanja u BiH kako mladi ljudi ne bi morali odlaziti u inostranstvo, te kako bi svoje potencijale mogli razvijati i realizirati kod kuće, u Bosni i Hercegovini, za dobrobit njenih građana," rekao je visoki predstavnik Inzko.

Inzko je također dodao da se možemo i zapitati da li bi Alma Zadić ikada bila imenovana na poziciju ministrice pravde na državnom, entitetskom ili kantonalnom nivou da je ostala u Bosni i Hercegovini.